

21. SUDAKSHINA, dextrorsum salutans illam, lacte abundantem, manu tenens pateram, granis adustis repletam, inclinato corpore venerata est latam ejus frontem, quasi januam ad voti sui impetrationem.

22. “ Quamquam vitulum appetens, immota venerationem accepit !” Hoc animadvertentes ambo lætabantur : nam favoris signa, a talibus erga venerabundos exhibita, certum fructum promittunt.

23. DILÍPAS, qui brachiis suis hostes exstinxerat, magistri ejusque uxoris pedes amplexus, cærimonia vespertina peracta, mulctoque finito, iterum vaccam recubantem adoravit.

24. Cibo atque lucernis juxta eam collocatis, postquam illa recubuerat, servator cum uxore sua consedit, deinceps postquam illa obdormuerat, quieti se dedit, atque mane surrexit, postquam illa a somno surrexerat.

25. Ita illi, gloria excellenti, prolis caussa cum uxore sua votum exsolventi, miseros salvare adsueto, ter septem dies transierunt.

26. Die sequente magistri ejus vacca sacra, comitis sui animam explorare cupiens, ingressa est PÁRVATIS parentis speluncam, *Gangæ* cataractæ vicinam, herbis tectam.

27. “ Ne cogitare quidem de illa subigenda possunt belluæ !” Hac fiducia rex oculos in pulchrum montem defixit, cum leo, invisus prosiliens, violenter illam raptaret.

28. Vaccæ mugitus, longe resonans e caverna, habenis quasi retraxit misericordis regis oculos, in montium principem defixos.

29. Conspexit ille, arcu instructus, leonem jubatum vaccæ fulvæ insistentem, veluti *rodhram* arborem floridam in metallifera montis planitie.

30. Tum rex, leonino incessu præditus, servator, qui hostes vi deleverat, ita circumventus, sagittam pharetra deprompturus erat, ad necandum leonem, nece dignum.

31. At dextera bellatoris, digitis defixis in sagittæ calamo, atque ungularum splendore ardeæ pennas illustrantibus, immota hæsit, atque quasi in tabula picta apparuit.

32. Rex, cujus ira brachio cohibito augebatur, ardore suo, leonem malefi-